

漢書



漢

書



漢書

漢蘭臺令史 班固 撰
唐祕書少監 顏師古 注

第 九 冊

卷五八至卷七〇（傳三）

中華書局

漢書卷五十八

公孫弘卜式兒寬傳第二十八

公孫弘，菑川薛人也。少時爲獄吏，有罪，免。家貧，牧豕海上。年四十餘，乃學春秋雜說。

武帝初卽位，招賢良文學士，是時弘年六十，以賢良徵爲博士。使匈奴，還報，不合意，^(一)上怒，以爲不能，弘乃移病免歸。^(二)

^(一)師古曰：「奏事不合天子之意。」

^(二)師古曰：「移病，謂移書言病也。一曰，以病移居。」

元光五年，復徵賢良文學，菑川國復推上弘。弘謝曰：「前已嘗西，用不能罷，願更選。」國人固推弘，弘至太常。上策詔諸儒：

制曰：蓋聞上古至治，畫衣冠，異章服，而民不犯；陰陽和，五穀登，六畜蕃，^(一)甘露降，風雨時，嘉禾興，朱草生，^(二)山不童，澤不涸；^(三)麟鳳在郊藪，龜龍游於沼，^(四)

河洛出圖書；父不喪子，兄不哭弟；北發渠搜，南撫交趾，〔三〕舟車所至，人迹所及，跂行喙息，咸得其宜。〔六〕朕甚嘉之，今何道而臻乎此？〔七〕子大夫修先聖之術，明君臣之義，講論洽聞，有聲乎當世，〔敢〕問子大夫：天人之道，何所本始？吉凶之效，安所期焉？〔八〕禹湯水旱，厥咎何由？仁義禮知四者之宜，當安設施？屬統垂業，物鬼變化，〔九〕天命之符，廢興何如？天文地理人事之紀，子大夫習焉。其悉意正議，詳具其對，著之于篇，〔一〇〕朕將親覽焉，靡有所隱。

〔一〕師古曰：「登，成也。蕃，多也，音扶元反。」

〔二〕師古曰：「𡗗，古草字。」

〔三〕師古曰：「童，無草木也。涸，水竭也，音胡各反。」

〔四〕師古曰：「邑外謂之郊。澤無水曰藪。沼，池也。」

〔五〕師古曰：「言威德之盛，北則徵發于渠搜，南則綏撫於交趾也。渠搜，遠夷之國也。」

〔六〕師古曰：「跂行，有足而行者也。喙息，謂有口能息者也。跂音岐。喙音許穢反。」

〔七〕師古曰：「臻，至也。」

〔八〕師古曰：「安，焉也。」

〔九〕師古曰：「屬，繫也，音之欲反。其下亦同。」

〔一〇〕師古曰：「悉，盡也。篇，簡也。」

弘對曰：

臣聞上古堯舜之時，不貴爵賞而民勸善，不重刑罰而民不犯，躬率以正而遇民信也；^{〔一〕}末世貴爵厚賞而民不勸，深刑重罰而姦不止，其上不正，遇民不信也。夫厚^{〔賞〕}重利未足以勸善而禁非，必信而已矣。是故因能任官，則分職治；^{〔二〕}去無用之言，則事情得；不作無用之器，即賦斂省；不奪民時，不妨民力，則百姓富；有德者進，無德者退，則朝廷尊；有功者上，無功者下，則羣臣遠；^{〔三〕}罰當罪，則姦邪止；賞當賢，則臣下勸。凡此八者，治^{〔民〕}之本也。故民者，業之即不爭，理得則不怨，有禮則不暴，愛之則親上，^{〔四〕}此有天下之急者也。故法不遠義，則民服而不離；和不遠禮，則民親而不暴。^{〔五〕}故法之所罰，義之所去也；^{〔六〕}和之所賞，禮之所取也。禮義者，民之所服也，而賞罰順之，則民不犯禁矣。故畫衣冠，異章服，而民不犯者，此道素行也。

〔一〕師古曰：「躬謂身親行之，遇謂處待之而已。」

〔二〕師古曰：「分音扶問反。」

〔三〕（師古）李奇曰：「言有次第也。」師古曰：「遼晉七旬反，其字從。」

〔四〕師古曰：「各得其業則無爭心，各申其理則無所怨，使之由理則無暴慢，子而愛之則知親上也。」

〔五〕師古曰：「遠，達也，音于萬反。」

〔六〕師古曰：「去，除也，音丘呂反。」

臣聞之，氣同則從，聲比則應。〔一〕今人主和德於上，百姓和合於下，〔二〕故心和則氣和，氣和則形和，形和則聲和，聲和則天地之和應矣。故陰陽和，風雨時，甘露降，五穀登，六畜蕃，嘉禾興，朱草生，山不童，澤不涸，此和之至也。故形和則無疾，無疾則不夭，故父不喪子，兄不哭弟。德配天地，明並日月，則麟鳳至，龜龍在郊，河出圖，洛出書，遠方之君莫不說義，〔三〕奉幣而來朝，此和之極也。

〔一〕師古曰：「比亦和也，音頻寐反。」

〔二〕師古曰：「合謂與上合德也。」

〔三〕師古曰：「說讀曰悅。」

臣聞之，仁者愛也，義者宜也，禮者所履也，〔一〕智者術之原也。致利除害，兼愛無私，謂之仁；〔二〕明是非，立可否，謂之義；進退有度，尊卑有分，謂之禮；〔三〕擅殺生之柄，通〔壅〕塞之塗，〔四〕權輕重之數，論得失之道，使遠近情僞必見於上，謂之術；〔五〕凡此四者，治之本，道之用也，皆當設施，不可廢也。得其要，則天下安樂，法設而不用；〔六〕不得其術，則主蔽於上，官亂於下。此事之情，屬統垂業之本也。

〔一〕師古曰：「履而行之。」

〔二〕師古曰：「致謂引而至也。」

〔三〕師古曰：「分音扶問反。」

〔四〕師古曰：「擅，專也。」

〔五〕師古曰：「見，顯也。」

〔六〕師古曰：「下不犯法，無所加刑也。」

臣聞堯遭鴻水，使禹治之，未聞禹之有水也。若湯之旱，則桀之餘烈也。桀紂行惡，受天之罰；禹湯積德，以王天下。因此觀之，天德無私親，順之和起，逆之害生。此天文地理人事之紀。臣弘愚戇，不足以奉大對。〔一〕

〔二〕師古曰：「大對，大問之對也。」

時對者百餘人，太常奏弘第居下。策奏，天子擢弘對爲第一。召入見，容貌甚麗，拜爲博士，待詔金馬門。〔二〕

〔一〕如淳曰：「武帝時，相馬者東門京作銅馬法獻之，立馬於魯〔班〕門外，更名魯〔班〕門爲金馬門。」

弘復上疏曰：「陛下有先聖之位而無先聖之名，有先聖之名而無先聖之吏，是以勢同而治異。先世之吏正，故其民篤；〔二〕今世之吏邪，故其民薄。政弊而不行，令倦而不聽。夫使邪吏行弊政，用倦令治薄民，民不可得而化，此治之所以異也。臣聞周公旦治天下，朞年

而變，三年而化，五年而定。唯陛下之所志。」^(一)書奏，天子以冊書答曰：「問：弘稱周公之治，弘之材能自視孰與周公賢？」^(二)弘對曰：「愚臣淺薄，安敢比材於周公！雖然，愚心曉然見治道之可以然也。夫虎豹馬牛，禽獸之不可制者也，及其教馴服習之，^(三)至可牽持駕服，唯人之從。」^(四)臣聞揉曲木者不累日，^(五)銷金石者不累月，夫人之於利害好惡，豈比禽獸木石之類哉？」^(六)莽年而變，臣弘尚竊遲之。」上異其言。

〔一〕師古曰：「篤，厚也。」

〔二〕師古曰：「言志所在也。」

〔三〕師古曰：「與猶如也。」

〔四〕師古曰：「馴，順也，音巡。」

〔五〕師古曰：「從人意。」

〔六〕師古曰：「揉謂矯而正之也。累，積也。揉音人九反。」

〔七〕師古曰：「好音呼到反。惡音一故反。」

時方通西南夷，巴蜀苦之，詔使弘視焉。還奏事，盛毀西南夷無所用，上不聽。每朝會議，開陳其端，使人主自擇，不肯面折庭爭。於是上察其行慎厚，辯論有餘，習文法吏事，緣飾以儒術，^(一)上說之，^(二)一歲中至左內史。

〔一〕師古曰：「緣飾者，譬之於衣，加純緣者。」

〔二〕師古曰：「說讀曰悅。」

弘奏事，有所不可，不肯庭辯。〔二〕常與主爵都尉汲黯請問，〔三〕黯先發之，弘推其後，上常說，〔三〕所言皆聽，以此日益親貴。嘗與公卿約議，〔四〕至上前，皆背其約以順上指。汲黯庭詰弘曰：「齊人多詐而無情，始爲與臣等建此議，今皆背之，不忠。」上問弘，弘謝曰：「夫知臣者以臣爲忠，不知臣者以臣爲不忠。」上然弘言。左右幸臣每毀弘，上益厚遇之。

〔一〕師古曰：「不於朝廷顯辯論之。」

〔二〕師古曰：「求空隙之暇。」

〔三〕師古曰：「說讀曰悅。」

〔四〕師古曰：「約，要也。」

弘爲人談笑多聞，〔二〕常稱以爲人主病不廣大，人臣病不儉節。養後母孝謹，後母卒，服喪三年。

〔一〕師古曰：「善於談笑而又多聞也。談字或作談，音恢，謂囑也，善囑諫也。」

爲內史數年，遷御史大夫。時又東置蒼海，北築朔方之郡。弘數諫，以爲罷弊中國以奉無用之地，〔二〕願罷之。於是上乃使朱買臣等難弘置朔方之便。發十策，弘不得一。〔三〕弘乃謝曰：「山東鄙人，不知其便若是，願罷西南夷、蒼海，專奉朔方。」上乃許之。

〔一〕師古曰：「罷讀曰疲。」

〔二〕師古曰：「言其利害十條，弘無以應之。」

汲黯曰：「弘位在三公，奉祿甚多，〔一〕然爲布被，此詐也。」上問弘，弘謝曰：「有之。夫九卿與臣善者無過黯，然今日庭詰弘，誠中弘之病。夫以三公爲布被，誠飾詐欲以釣名。〔二〕且臣聞管仲相齊，有三歸，〔三〕侈擬於君，〔四〕桓公以霸，亦上僭於君。晏嬰相景公，食不重肉，妾不衣絲，齊國亦治，亦下比於民。〔五〕今臣弘位爲御史大夫，爲布被，自九卿以下至於小吏無差，誠如黯言。且無黯，陛下安聞此言？」上以爲有讓，愈益賢之。

〔一〕師古曰：「奉音扶用反。其下亦同。」

〔二〕師古曰：「釣，取也。言若釣魚之謂也。」

〔三〕師古曰：「三歸，取三姓女也。婦人謂嫁曰歸。」

〔四〕師古曰：「擬，疑也，言相似也。」

〔五〕師古曰：「比，方也。一曰，比，近也，音頻寐反。」

元朔中，代薛澤爲丞相。先是，漢常以列侯爲丞相，唯弘無爵，上於是下詔曰：「朕嘉先聖之道，開廣門路，宣招四方之士，蓋古者任賢而序位，量能以授官，勞大者厥祿厚，德盛者獲爵尊，故武功以顯重，而文德以行褒。其以高成之平津鄉戶六百五十封丞相弘爲平津

侯。其後以爲故事，至丞相封，自弘始也。

時上方興功業，婁舉賢良。^{〔二〕}弘自見爲舉首，起徒步，數年至宰相封侯，於是起客館，開東閣以延賢人，^{〔三〕}與參謀議。弘身食一肉，脫粟飯，^{〔三〕}故人賓客仰衣食，^{〔四〕}奉祿皆以給之，家無所餘。然其性意忌，外寬內深。^{〔五〕}諸常與弘有隙，無近遠，雖陽與善，後竟報其過。殺主父偃，徙董仲舒膠西，皆弘力也。

〔一〕師古曰：「婁，古厲字。」

〔二〕師古曰：「閣者，小門也，東向開之，避當庭門而引賓客，以別於掾史官屬也。」

〔三〕師古曰：「才脫粟而已，不精（鑿）也。脫音他活反。」

〔四〕師古曰：「故人，平生故交也。仰音牛向反。」

〔五〕師古曰：「意忌，多所忌害也。」

後淮南、衡山謀反，治黨與方急，弘病甚，自以爲無功而封侯，居宰相位，宜佐明主填撫國家，^{〔二〕}使人由臣子之道。^{〔三〕}今諸侯有畔逆之計，此大臣奉職不稱也。^{〔三〕}恐病死無以塞責，^{〔四〕}乃上書曰：「臣聞天下通道五，所以行之者三。君臣、父子、夫婦、長幼、朋友之交，五者天下之通道也；仁、知、勇三者，所以行之也。故曰『好問近乎知，^{〔五〕}力行近乎仁，^{〔六〕}知恥近乎勇。』^{〔七〕}知此三者，知所以自治；知所以自治，然後知所以治人。』^{〔八〕}未有不能自治

而能治人者也。陛下躬孝弟，監三王，建周道，兼文武，招徠四方之士，任賢序位，量能授官，將以厲百姓勸賢材也。今臣愚駑，無汗馬之勞，^{〔九〕}陛下^{〔下〕}過意擢臣弘卒伍之中，^{〔二〕}封爲列侯，致位三公。臣弘行能不足以稱，^{〔三〕}加有負薪之疾，恐先狗馬填溝壑，終無以報德塞責。願歸侯，乞骸骨，避賢者路。」上報曰：「古者賞有功，褒有德，守成^{〔上〕}文，遭遇右武，^{〔三〕}未有易此者也。^{〔三〕}朕夙夜庶幾，獲承至尊，懼不能寧，惟所與共爲治者，君宜知之。^{〔四〕}蓋君子善善及後世，若茲行，常在朕躬。^{〔五〕}君不幸罹霜露之疾，何恙不已，^{〔六〕}乃上書歸侯，乞骸骨，是章朕之不德也。^{〔七〕}今事少閒，^{〔八〕}君其存精神，止念慮，輔助醫藥以自持。」因賜告牛酒雜帛。居數月，有瘳，視事。

〔一〕師古曰：「填音竹刃反。」

〔二〕師古曰：「由，從也。」

〔三〕師古曰：「稱，副也。」

〔四〕師古曰：「塞，當也。」

〔五〕師古曰：「疑則問之，故成其智。」

〔六〕師古曰：「屈已濟物，故爲仁也。」

〔七〕師古曰：「不求苟得，故爲勇也。」

〔八〕師古曰：「自『好問近乎知』以下，皆禮記中庸之辭。」

〔九〕師古曰：「言未嘗從軍旅。」

〔一〇〕師古曰：「過猶誤也。」

〔一一〕師古曰：「不副其任也。」

〔一二〕師古曰：「右亦上也，禍亂時則上武耳。」

〔一三〕師古曰：「易，改也。」

〔一四〕師古曰：「惟，思也。知謂知治道也。」

〔一五〕師古曰：「朕常思此，不息於心也。」

〔一六〕師古曰：「罹，遭也。恙，憂也。已，止也。言何憂於疾不止也。」禮記曰「疾止復初」也。

〔一七〕師古曰：「章，明也。」

〔一八〕師古曰：「閒言有空隙也。閒讀曰閑。」

凡爲丞相御史六歲，年八十，終丞相位。其後李蔡、嚴青翟、趙周、石慶、公孫賀、劉屈氂繼踵爲丞相。〔一〕自蔡至慶，丞相府客館丘虛而已，〔二〕至賀，屈氂時壞以爲馬廐車庫奴婢室矣。唯慶以惇謹，復終相位，〔三〕其餘盡伏誅云。

〔一〕師古曰：「繼踵，言相踵也。屈音丘勿反，又鉅勿反。僇音力之反。」

〔二〕師古曰：「言不能進賢，故不繕修其室屋也。虛讀曰墟。」

〔三〕師古曰：「惇，厚也，音敦。」

弘子度嗣侯，爲山陽太守十餘歲，詔徵鉅野令史成詣公車，度留不遣，坐論爲城旦。

元始中，修功臣後，下詔曰：「漢興以來，股肱在位，身行儉約，輕財重義，未有若公孫弘者也。位在宰相封侯，而爲布被脫粟之飯，奉祿以給故人賓客，無有所餘，可謂減於制度。」而度率下篤俗者也，^(一)與內富厚而外爲詭服以釣虛譽者殊科。^(二)夫表德章義，所以率世厲俗，聖王之制也。其賜弘後子孫之次見爲適者，^(三)爵關內侯，食邑三百戶。」

〔一〕應劭曰：「禮，貴有常尊，衣服有品。」

〔二〕師古曰：「篤，厚也。」

〔三〕師古曰：「詭，違也。詭服，謂與心志相違也。一曰，違衆之服也。」

〔四〕師古曰：「見音胡電反。適讀曰嫡。」

卜式，河南人也。以田畜爲事。有少弟，弟壯，式脫身出，^(一)獨取畜羊百餘，田宅財物盡與弟。式入山牧，十餘年，羊致千餘頭，買田宅。而弟盡破其產，式輒復分與弟者數矣。^(二)

〔一〕師古曰：「脫身謂引身出也。脫音他活反。」

〔二〕師古曰：「數音所角反。」

時漢方事匈奴，式上書，願輸家財半助邊。上使使問式：「欲爲官乎？」式曰：「自（小）牧羊，不習仕宦，不願也。」使者曰：「家豈有冤，欲言事乎？」式曰：「臣生與人亡所爭，邑人貧者貸之，（二）不善者教之，所居，人皆從式，式何故見冤！」使者曰：「苟，子何欲？」（三）式曰：「天子誅匈奴，愚以爲賢者宜死節，有財者宜輸之，如此而匈奴可滅也。」使者以聞。上以語丞相弘。弘曰：「此非人情。不軌之臣（三）不可以爲化而亂法，願陛下勿許。」上不報，數歲乃罷式。式歸，復田牧。

（一）師古曰：「貸音土戴反。」

（二）師古曰：「言子苟如此輸財，必有所欲。」

（三）師古曰：「軌亦法也。」

歲餘，會渾邪等降，縣官費衆，倉府空，（二）貧民大徙，皆叩給縣官，（三）無以盡贍。式復持錢二十萬與河南太守，以給徙民。河南上富人助貧民者，上識式姓名，曰：「是固前欲輸其家半財助邊。」乃賜式外繇四百人，（三）式又盡復與官。是時富豪皆爭匿財，（四）唯式尤欲助費。上於是以式終長者，乃召拜式爲中郎，賜爵左庶長，（五）田十頃，布告天下，尊顯以風百姓。（六）

（一）師古曰：「倉，粟所積也。府，錢所聚也。」

〔二〕師古曰：「印音牛向反。」

〔三〕蘇林曰：「外繇謂戍邊也。一人出三百錢，謂之過更。式歲得十二萬錢也。一說，在繇役之外得復除四百人也。」

師古曰：「一說是。」

〔四〕師古曰：「匿，藏也。」

〔五〕師古曰：「第十爵。」

〔六〕師古曰：「風讀曰諷。」

初式不願爲郎，上曰：「吾有羊在上林中，欲令子牧之。」式既爲郎，布衣中蹻而牧羊。〔一〕歲餘，羊肥息。〔二〕上過其羊所，善之。式曰：「非獨羊也，治民亦猶是矣。以時起居，惡者輒去，〔三〕毋令敗羣。」上奇其言，欲試使治民。拜式緹氏令，緹氏便之；遷成臯令，將漕最。〔四〕上以式朴忠，〔五〕拜爲齊王太傅，轉爲相。

〔一〕師古曰：「蹻，卽今之鞋也，南方謂之蹻。字本作屨，並音居略反。」

〔二〕師古曰：「息，生也。言羊既肥而又生多也。」

〔三〕師古曰：「去，除也，音丘巨反。」

〔四〕師古曰：「爲縣令而又使（令）領漕，其課最上。」

〔五〕師古曰：「朴，質也。」

會呂嘉反，式上書曰：「臣聞主媿臣死。羣臣宜盡死節，其驚下者宜出財以佐軍，如是